



Aqqa Samuelsen
Inatsisartuni ilaasortaq
Inuit Ataqaatigiit
Maani/

§ 37 naapertorlugu apeqquteqaammut nr. 2019_219-imut umimmaqarfinni tamani umimmannik pisasseeriaatsit aamma Naternami umimmaat pillugit akissuteqaat

Inatsisartut suleriaasissaanni § 37-mi imm. 1 naapertorlugu umimmaqarfinni tamani umimmannik pisasseeriaatsit aamma Naternami umimmaat pillugit Naalakkersuisunut apeqquteqarputit. Apeqqutit uannit akineqartussanngorlugit innersuunneqarput.

Apeqquteqaat 1. Umimmaqarfinni tamani pisasseeriaatsit qanoq ittut atorlugit umimmannik pisassiisoqartarpa?

a. Umimmaqarfinni tamani umimmannik pisasseeriaaseq Naalakkersuisut allanngortinnissaanut pilersaaruteqarpat?

b. Kommune Qeqertalimmi illoqarfinni nunaqarfinnilu najugaqartunut taamaallaat Naternami umimmaat piniarneqarsinnaalernissaannut Naalakkersuisut pilersaaruteqarpat?

1-imut:

Umimmaqarfinni uumassusililerinermik siunnersuineq kisitsinermik aallaveqartoq tunngavigalugu pisassiisoqartarpoq, kisianni ilaatigut aamma minnerpaaffiliinermik kisitsinermik aallaaveqartumik. Pisassiissutit tusarniaasoqareernerata kingorna aalajangersarneqartarput.

a.-mut: Naalakkersuisut pisasseeriaatsip allanngortinnissaa pilersaarutigiinngilaat.

b.-mut: Naternami umimmaniarnissamut aqutsiveqarfiit pisassinneqartartut tassaapput Aasiaat, Qasigiannugit, Kangaatsiaq, Ilulissat aamma Qeqertarsuaq. Nunaqarfiit aqutsiveqarfinnut ilaapput. Qaasuitsup Kommunian immikkoortinneqanngikkallarmat taamatut pisassiisoqartarpoq, tamannalu ingerlateqqiinnarneqassasoq Naalakkersuisut siunertaaraat soorluttaaq Kommune Qeqertalimmi najugaqartut Nuussuarmi aamma tututassinneqartartut.

Apeqquteqaat 2. Naternami umimmaat suna pissutigalugu ikinnerungaatsialernerat Naalakkersuisut paasissutissiissutigisinnaavaat?

a. Naternami nunap immikkoortuani sumi umimmaat ikinnerungaatsialersimappat?

2-mut:

Naternami umimmaat ikinnerungaatsialernerat atuisut tungaaniit nalunaarutigineqartoq annerusumik oqaaseqarfigisinnaanngilara. Pinngortitaleriffimmiit nalunaarutigineqarpoq 1993-mi Pinngortitaleriffik pilersinneqanngikkallarmat Naternamut 31-nik umimmalii-soqartoq 2004-milu umimmannik kisitsisoqarnerani umimmaat 112-it kisinneqarlutik.

Ulloq: 03-07-2019
Suliap normua: 2019 - 15727
Dok normu: 42651796
Postboks 269
3900 Nuuk
Oqarasuaat (+299) 34 50 00
Fax: (+299) 34 63 55
E-mail: apn@nanoq.gl
www.naalakkersuisut.gl

a.-mut Naternami umimmaat ikinnerungaatsialernerat Niaqornaarsummi atuisut tungaaniit nalunaarutigineqarpoq.

Apeqquteqaat 3. Naternami umimmaat qaqugu piniarneqaqqissinnaalissanersut naatsorsuutigineqassava?

a. Naternami umimmaat piniaqqusaajunnaarnerat tammajuitsussarsiniarluni umimmanniartitsisartunut aamma atuuppa?

b. Naternami umimmaat piniaqqusaajunnaarnerisa nalaani nakkutilliisoqarnissaa Naalackersuisut qanoq qulakkeerniarpaat?

3-mut:

Naternami umimmaat ukioq manna 1. august-imiit 15. oktobari ilanngullugu piniarneqaqqissinnaassapput.

a.-mut: Naternami umimmaat piniaqqusaajunnaarnerat pillugu aalajangerneqaraluartoq nutaamik aalajangiisoqarnikkut allanngortinneqarnikuuvoq tamannalu tammajuitsussarsiniarluni umimmanniartitsisartunut aamma atuuppoq.


b.-mut: Naternami nakkutilliisoqarnissaa sulissutigineqarpoq soorlutaaq nunatta sinnerani umimmanniarnermi pingaarnersiuiinikkut nakkutilliisoqartartoq. Nakkutilliinissami nukissat killeqarmata piffiit ilaat allaniit pingaarnerutinneqarsinnaapput.

Apeqquteqaat 4. Naternami umimmannik kisitsisoqarnissaa nunap immikkoortuani sumi, kikkut aammalu qanoq ingerlanneqartussaannersoq Naalackersuisut nassuiarsinnaavaat?

4-mut:

Uumasoaqatigiinnik kisitsisarnerit pillugit pingaarnersiuiineq ataavartoq aningaasanut inatsimmi Pinngortitaleriffiup aningaasaliiffigineqarnerata iluani Pinngortitaleriffiup siulersuisunit aalajangersarneqartarpoq, taakkulu uumasoaqatigiit assigiinngitsut pillugit sulianut agguaaassisartuullutik. Pingaarnersiuiineq Pinngortitaleriffiup 2018-2022-mi iliuuseqarnissamat pilersaarutaani siulersuisunit akuerisaasumi allaatigineqarpoq. Uumasoaqatigiit assigiinngitsut pillugit suliat iliuuseqarnissamat pilersaarummi allaatigineqarput. Naternami umimmannik kisitsisoqarnissaa Pinngortitaleriffiup 2018-2022-mi iliuuseqarnissamat pilersaarutaani pingaarnersiorneqarsimanngilaq. Umimmaqatigiinnik minnerusunik kisitsisarnerit allatut iliornikkut minnerpaaffiliinermik kisitsinertut piniarnermut nakkutilliisunit piniartunillu nunakkut ingerlaarnikkut ingerlanneqarsinnaapput. Minnerpaaffiliinermik kisitsisarnerit sumiiffimmi pilersaarusiornikkut aningaasaliisoqarnikkullu ingerlanneqarsinnaapput.

Inussiarnersumik inuulluaqqusillunga




Jens Immanuelson

Aalisarnermut, Piniarnermut Nunalerinermullu Naalackersuisoq

INUIT ATAQATIGIIT

Inatsisartuni



24.06.2019

Inatsisartut Suleriaasianni § 37 imm. 1 naapertorlugu Naalackersuisunut apeqqt imaattoq matumuuna saqqummiuppara.

Naalackersuisunut apeqqt:

- 1) Umimmaqarfinni tamani pisasseeriaatsit qanoq ittut atorlugit umimmannik pisassiisoqartarpa?
 - a. Umimmaqarfinni tamani umimmannik pisasseeriaaseq Naalackersuisut allanngortinnissaanut pilersaaruteqarpat?
 - b. Kommune Qeqertalimmi illoqarfinni nunaqarfinnilu najugaqartunut taamaallaat Naternami umimmaat piniarneqarsinnaalernissaannut Naalackersuisut pilersaaruteqarpat?
- 2) Naternami umimmaat suna pissutigalugu ikinnerungaatsialernerat Naalackersuisut paasissutissiissutigisinnaavaat?
 - a. Naternami nunap immikkoortuani sumi umimmaat ikinnerungaatsialersimappat?
- 3) Naternami umimmaat qaqugu piniarneqaaqqissinnaalissanersut naatsorsuutigineqassava?
 - a. Naternami umimmaat piniaqqusaajunnaarnerat tammajuitsussarsiniarluni umimmanniartitsisartunut aamma atuuppa?
 - b. Naternami umimmaat piniaqqusaajunnaarnerisa nalaani nakkutilliisoqarnissaa Naalackersuisut qanoq qulakkeerniarpaat?
- 4) Naternami umimmannik kisitsisoqarnissaa nunap immikkoortuani sumi, kikkut aammalu qanoq ingerlanneqartussaannersoq Naalackersuisut nassuiarsinnaavaat?

(Inatsisartunut Ilaasortaq Aqqa Samuelson, Inuit Ataqatigiit)

Tunngavilersuut:

Naalackersuisut nittartagaanni umimmaqarfimmi Naternami inuussutissarsiutigalugu aamma sunngiffimmi umimmanniarneq kisitsisoqareernissaata tungaanut, umimmaat ikinnerungaatsialernerat tunngavilersuutigalugu, ukiuni marlunni ukioq kaajallallugu matuneqassasoq nalunaarutigineqarpoq.

Naalackersuisut erseqqissumik paasissutissiineq ajornerat pequtigalugu Naternami umimmaat piniaqqusaajunnaarnerat susasaqartuniit paasiuminaatsinneqarpoq.

Naternami umimmanniarnermut susasaqartut eqqarsaatigalugit Naternami umimmaat piniaqqusaajunnaarnerat pillugu Naalackersuisut erseqqinnerusumik paasissutissiinissaat pingaarutilerujussuuvoq. Tamatumalu ilutigisaanik Naternami umimmaat piniaqqusaajunnaarnerisa nalaani nakkutilliineq qanoq ittoq Naalackersuisunit

qulakkeerniarneqarnersoq ilanngullugu paasissutissiissutigineqartariaqarluni, umimmannik piniqqusiunnaarneq pinngitsoorani nakkutilliinermik sukateriffiusumik kinguneqartariaqarmat.

Kommune Qeqertalimmi illoqarfinni nunaqarfinnilu najugaqartunuinnaq Naternami umimmaat piniarneqarsinnaalissanersut Naternami umimmanniarnermut susassaqartunut ilanngullugu paasissutissiissutigineqartariaqarpoq.

Ullut sulliviit qulit iluanni apeqqutinnut akissutit tigunissaannut qilanaarpunga.